

INFORMACIJA O ODRŽAVANJU MEĐUNARODNOG SIMPOZIJUMA O PROIZVODNJI, PRERADI I PROMETU KAJSIJA

Pojavom i proširenjem bakterijalnih, gljivičnih, virusnih i drugih oboljenja, a posebno »apopleksije« kod kajsija, djelovao je na stagnaciju i smanjenje proizvodnje ovog voća u mnogim proizvođačkim zemljama svijeta. Visoki kvalitet plodova kajsija, njihova široka upotrebna vrijednost, naročito u prehrambenoj industriji i izvozu, utjecalo je na povećanje potražnje na unutrašnja i međunarodna tržišta. Ovakvo stanje i nastale protivrječnosti između proizvodnje, a i ponude i tražnje ovih plodova stimuliralo je rad mnogih zemalja za traženje rješenja »apopleksije« i drugih oboljenja i problema, kako bi stvorili uvjete za proširenje njihovog gajenja i proizvodnje.

Po svojim ekološkim uvjetima i dosadašnjom proizvodnjom naša zemlja zauzima značajno mjesto u evropskoj, pa i u svjetskoj proizvodnji kajsije, te predstavlja značajan faktor i u međunarodnom prometu. Međutim, pojavom navedenih oboljenja dovelo je i kod nas do duže stagnacije podizanja kajsijara ne samo na društvenim već i na gospodarstvima individualnih proizvođača, što je imalo za posljedicu i smanjenje proizvodnje.

Kod ovakvog stanja i zainteresovanosti mnogih zemalja, pokrenuta je inicijativa da se u našoj zemlji ove godine održi međunarodni sastanak — simpozijum o kajsiji, na kome bi stručnjaci pojedinih zemalja iznijeli rezultate dosadašnjih istraživanja u rješenju postojećih problema. Smatra se, da bi ovim putem najbrže i najlakše postigli izmjenu metoda i rezultata istraživanja na ovom sektoru, uz istovremeni dogovor o smjernicama daljeg zajedničkog ili individualnog rada. To bi pridonijelo da se svaka zemlja i stručnjaci upoznaju s postignutim rezultatima, i s njihovim primjenjivanjem u praksi, te šta treba dalje raditi da bi se utjecalo na njihovo brže i kvalitetnije rješenje. Ovu inicijativu su prihvatili stručnjaci gotovo svih proizvođačkih zemalja svijeta.

Centralni odbor SPITJ-e je prihvatio tu inicijativu, pa je formiran i Organizacioni odbor koji vrši pripreme za njegovu održavanje. Usvojeni su slijedeći zaključci:

— Da se Simpozijum održi od 8. do 13. srpnja u Subotici (u sali Skupštine općine Subotica). U toku rada Simpozijuma bit će pođnijeti referati i saopćenja iz oblasti proizvodnje, prerade i prometa kajsija i posjetit će se postojeći objekti na području Subotice.

— Za Simpozijum je prijavljeno oko 78 referata-saopćenja iz 21 zemlje, uključivši i najudaljenije (SAD, Argentina, N. Zeland, Australija i dr.).

— Cjelokupan rad na Simpozijumu će se vršiti simultanim prevođenjem na 4 jezika (srpskohrvatski, engleski, ruski i francuski). Rezime referata i saopćenja bit će odštampani (na 4 jezika) i predati učesnicima prije početka rada Simpozijuma.

— Radi velikog interesa inozemnih i naših stručnjaka za rad ovog Simpozijuma i ograničenih tehničkih mogućnosti za prevođenje, molimo zainteresirane privredne organizacije i stručnjake da čim prije prijave svoje učešće na adresu: dr Staniša Paunović, Institut za voćarstvo Čačak. Organizacioni odbor ne preuzima obavezu da kasno prijavljenima ili neprijavljenima učesnicima osigura štampani materijal ili tehnička pomagala za praćenje rada Simpozijuma.

— Za dobivanje obrađenih i prevedenih rezimea referata kao i drugih materijala, prijavljeni učesnici su dužni da participiraju 250 novih dinara po učesniku. Potvrda banke o izvršenoj uplati služiti će kao dokumenat za dobivanje svih pripremljenih materijala.

— Na inicijativu stručnjaka iz Mađarske nakon završetka rada Simpozijuma predviđena je trodnevna ekskurzija naših stručnjaka u Mađarsku, gdje će se razgledati plantažni nasadi kajsijsa i drugog voća (dok će se strane učesnike biti organizirana posjeta plantaža u našoj zemlji). Prijava učešća za ovu ekskurziju se vrši na adresu »Kompas« — Subotica, ul. D. Tucovića.

— Za sva druga obavještenja o Simpozijumu interesenti se mogu obratiti dr Staniši Paunoviću — Institut za voćarstvo Čačak, Društvu poljoprivrednih inženjera i tehničara u Subotici ili »Kompasu« — Subotica (radi smještaja, ishrane, ekskurzije i dr.)

Za Organizacioni odbor

Dr Al. Mišev, s. r.